



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百七十二

咸豐五年乙卯七月壬申卯刻

上詣

慈寧宮

大行皇太后几筵前行朝奠禮午刻行午奠禮申刻行夕奠禮

○諭內閣朕讀

大行皇太后遺誥

諭朕持服二十七日而除朕追懷

撫育深恩何忍遽遵

遺命特命王大臣等悉心會議。茲據惠親王綿愉及恭理喪儀王大臣等合詞籲懇。請酌遵舊典。於二十七日大祭後除服。朕心終有未安。惟仰體

大行皇太后謙抑之懷。矜恤之意。不得不稍從抑制。以示遵循。所有二十七日以外。百日以前。朕詣

几筵前。仍穿縞素。在宮辦事。及接見臣工。勉御青袍褂。仍俟百日後。再行除服。其百日以後。應穿服色。仍著惠親王綿愉恭理喪儀王大臣。御前大臣。軍機大臣。會同禮部。妥議具奏。○又諭黃宗漢奏。請查禁販運黑鉛一摺。四川雲南貴州各省。多有產鉛之區。所採鉛斤。半歸官賣。半歸商銷。向無例禁之

文。惟黑鉛有關軍火。若任令行店市商。照常販運。輾轉銷售。莫究歸宿。流弊滋多。必當嚴行禁止。嗣後除白鉛一項。仍聽商人行運外。其黑鉛著四川雲南貴州各督撫。分飭所屬地方各員。一律嚴禁。不准出境。並飭各廠員及水陸各州縣。各關隘口。會同營汛。查拏偷漏。儻有抗違。照私販硝磺例。加等治罪。仍須人鉛並獲。以杜妄拏訛詐等弊。○廣西巡撫勞崇光奏。艇匪攻撲潯州。現籌勦辦情形。得旨。所撥兵數。不盈千。誠恐難期得力。能否再行添調。著速速籌辦。○以失察汛弁包庇開竈。泰甯鎮總兵官慶祺。下部議處。○蠲緩廣西臨桂陽朔永甯永福雒容柳城來賓天河賓遷江恭城荔浦修仁。

昭平永安蒼梧容宣化新甯橫永淳龍州崇善養利左永康甯明天保二十八廳州縣及忠上林田歸德果化羅陽萬承思陵憑祥太平安平上龍茗盈結安佶倫龍英都結江思上下凍向武上石西下石西恩城遷隆全茗鎮遠羅白白山興隆定羅舊城下旺那馬都陽古零安定何旺三十八土州縣司堡被擾地方額賦有差○癸酉

上詣

慈宣宮

大行皇太后几筵前供奠○甲戌

上詣

慈宣宮

大行皇太后几筵前供奠○諭內閣朕蒙

大行皇太后撫育深恩十有五載是以崇上

尊號稍展孝思初九日痛遭

仙馭升遐一切典禮俱命該衙門敬謹豫備惟念

升祔

太廟大典攸關

列聖相承具有定制朕不敢以一己之感

恩致違

大行皇太后謙沖之盛德將來奉安

山陵禮成後恭奉

神牌黃輿還京敬謹

升祔

奉先殿以伸永慕所有應行典禮著該衙門屆時查例具奏○
又諭

大行皇太后德音懋著

懿德光昭覆庇朕躬十有五載

鴻稱疊晉尊養兼隆今茲

仙馭升遐朕心哀痛不能稍釋敬稽典禮宜隆

諡號以表尊崇著大學士九卿會同敬謹詳議具奏○又諭戶

部奏請截留豫東漕糧辦賑一摺現在東河下北廳屬黃流
漫溢被水災黎自應亟籌撫恤除各該督撫遵諭趕緊籌辦
外著照該部所請所有本年山東省未經起運之漕米即著
就近截留五萬石交崇恩確查被災較重地方速為賑濟一
面咨查直隸被災各屬酌量撥給其河南省應徵未完漕米
五萬餘石並著英桂督飭各該州縣趕緊徵收於該省應行
給賑地方隨徵隨放該督撫等務當嚴飭承辦各員認真散
放如有州縣辦理不善及吏胥舞弊各情即著嚴行叅辦用
副朕軫念災黎至意○又諭蔣蔚遠奏請展緩鄉試一摺本
年貴州省應舉行乙卯科文武鄉試據稱該省夷苗滋事辦

理堵勦勢難兼顧。自係實在情形。所有本年貴州省乙卯科文武鄉試著准其展至戊午科歸併舉行。按照兩科定額取中。貴州正考官編修王祖培。副考官編修錢桂森。無論行抵何處著即馳驛回京。○諭軍機大臣等。恆春。舒興。阿泰。滇省軍需緊要。請飭廣東。浙江。兩省迅解協滇餉銀一摺。雲南省軍餉等款。向資各省協濟。現因貴州勦匪喫緊。滇省解黔之餉。先後已及十四萬餘兩。司庫支絀。無款可籌。著葉名琛。柏貴。何桂清。將該省奉部指撥滇省協餉銀共四十五萬兩。迅即籌款。派委妥員管解赴滇。毋稍遲誤。將此由五百里各諭令知之。○以福建捐輸軍餉。永廣臺灣府閩籍鄉試中額一

名。龍溪縣學額四名。閩侯官二縣各二名。同安詔安永安三縣各一名。○乙亥。

上詣

慈宣宮

大行皇太后几筵前供奠。○諭內閣。本月二十一日。奉移

大行皇太后梓宮於綺春園。朕即居住圓明園辦事。以便恭奠几筵。用伸哀慕。○丙子。中元節。

上詣

慈宣宮

大行皇太后几筵前。行中元大祭禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵○遣官祭

孝德皇后殯宮○遣官祭

端慧皇太子園寢○諭內閣前以

大行皇太后百日後朕應用服色諭令惠親王綿愉等會同禮

部議奏茲據集議具奏自應仰體

大行皇太后慈愛之心於百日除服即照二十七月釋服禮舉

行惟

梓宮暫安綺春園朕當仍御青褂尋常袍俟奉移

山陵後一切服色從吉。其未經奉移

山陵以前所有

壇

廟祭祀齋戒。以及朝會典禮服色。即照釋服後常例服用。至臣工以下服色。著該部再行覈議具奏。○又諭惠親王綿愉等奏酌議在京民人等嫁娶作樂日期等語。著照所請。所有在京民人等。著准其於一月後嫁娶作樂。仍百日不雜髮。並准其於百日後尋常宴會作樂。○命倉場侍郎文彩恭理喪儀。○以正白旗滿洲副都統阿彥達署倉場侍郎。前倉場侍郎朱嶸署吏部左侍郎。署吏部左侍郎沈兆霖署工部右侍郎。

兼管錢法堂事務。○以克復安徽徽州府城。賞知府王有齡遊擊魁齡花翎。縣丞程洪等藍翎。餘加銜升敘有差。○丁丑。

上詣

慈宣宮

大行皇太后几筵前供奠。○諭內閣。西凌阿等奏德安逆匪分股竄撲勇隊營盤。現在飭收兵勇。以圖攻取一摺。本月初二日。德安府城賊匪分股竄撲三陂港等處。參將劉富成帶勇迎殺。總管德楞額率領馬隊接應。槍箭齊施。賊眾由兩旁抄裹。勇隊營盤猝被燒毀。西凌阿等統兵督勦德安逆匪。未能及時攻取。致被賊撲營盤。損失軍裝器械。實屬調度乖方。西

實錄卷之三十三
一七五
凌阿。綿洵均著革職留任。以示薄懲。孔廣順。訥欽。未能帶兵接應。亦屬怯懦無能。均著革職留營効力。以贖前愆。賊匪現踞德安。著官文迅速前進。會同攻勦。西凌阿總統諸軍。毫無紀律。頓兵不戰。以致為賊所乘。殊堪痛恨。儻再不知愧奮。必當重治其罪。○諭軍機大臣等。西凌阿。綿洵奏逆匪竄撲。步兵潰散一摺。又據奏退回隨州。收集兵勇。相機前進等語。覽奏實堪痛恨。西凌阿統領諸軍。勦辦楚匪。乃抵德安後。毫無布置。並未督兵攻勦。及賊匪撲出。營盤輒被燒毀。孔廣順。訥欽。所帶步兵。望風而靡。營盤亦被賊踞。可見平日既調度乖方。臨時又不能相機策應。如果聯絡劄營。互相援應。何至遇

賊即潰耶。至五營義勇。屢次諭令該大臣妥為駕馭。乃竟有邢興未等率眾投入賊夥之事。我軍虛實。該逆得以周知。其患更甚。該大臣等因長林岡勢難久駐。退回隨州。所帶馬隊兵勇。僅止三千。義勇二千餘名。兵力愈形單弱。本日已諭令都興阿。將馮官屯官兵二千名。帶赴湖北軍營。交西凌阿等調遣。以資攻勦。官文前奏督兵由襄陽啟程。順流下擊。此次我兵失事。賊勢更形猖獗。該督自應趕緊馳赴德安。會同攻勦。使軍威復振。以遏賊鋒。至逆匪北竄。固不可不防。然能奮力進攻。該逆方自保之不暇。何能遠竄。若如西凌阿之以嚴防北竄為詞。以掩其節節退守之罪。是又蹈楊需故轍。國法

具在。豈能屢邀寬宥耶。現在存營義勇。是否足恃。潰散兵勇。應如何分別留撤。該大臣等。務當悉心籌畫。毋令再滋他變。將此由六百里加緊各諭令知之。○又諭英桂奏。探聞德安賊匪突出竄撲。官軍失利。現籌嚴防信陽三關。並勦辦匪徒情形一摺。前因河北新鄉縣刁民糾眾圍城。諭令英桂將南路防堵事宜責成。邱聯恩等籌辦。該撫即前赴新鄉。迅將匪徒撲滅。茲據奏稱。輝縣等處鄉民業經崇安等再三曉諭。不致暗相勾結。新鄉刁民其勢已孤。俟兵勇到齊。諒可迅速勦除。而楚北官軍現經失利。則信陽三關愈形喫重。必得在防文武嚴密戒備。不可稍形鬆懈。該撫應否親赴新鄉。或仍駐

信陽防堵。著即酌量緩急。迅速覆奏。仍著嚴飭崇安。將斯崇等務將新鄉匪徒趕緊勦辦。並將首犯及餘匪搜捕淨盡。毋留餘孽。至西凌阿退駐隨州。兵勇潰散已多。不敷攻勦。本日已諭知官文帶兵前進。會同勦辦。並諭都興阿管帶駐劄馮官屯之官兵二千名。即日赴楚助勦。該副都統帶兵經過豫省所需軍火。並著英桂隨時接濟。毋令缺乏。將此由六百里加緊諭令知之。○又諭本日據西凌阿等奏。德安城內賊匪分三股竄出。已革參將劉富成等督兵抵禦。因眾寡不敵。以致兵勇營盤被賊焚毀。占踞孔廣順所帶兵勇逃散居多。五營義勇並多投入賊營。該大臣現在退守隨州。嚴防北竄。楚

北賊勢披猖。必得厚集兵力。以資勦辦。所有駐劄馮官屯官
兵二千名。皆係勁旅。著都興阿。即日統帶啟程。前赴湖北西
凌阿軍營聽候調遣。該官兵啟行時。所需軍裝口糧車輛等
項。著崇恩迅速應付。毋誤軍行。並將啟程日期。先行具奏。將
此由六百里各諭令知之。欽差大臣西凌阿等奏。德安逆
匪分股竄撲。兵勇潰散。自請治罪。得旨。聯絡劄營。何至若是
挫敗。西凌阿到楚以來。並無大舉。遭此失事。軍威何日復振。
豈事前漫無防範耶。戊寅。

上詣

慈宣宮

大行皇太后几筵前供奠。○以刑部右侍郎國瑞。管寶坻等四
處官兵事。○已卯。

上詣

慈宣宮

大行皇太后几筵前供奠。○以安徽巢縣勦賊失利。革鑲紅旗
蒙古副都統忠泰職。○以工部右侍郎基溥。兼鑲紅旗蒙古
副都統。○庚辰。

上詣

慈宣宮

大行皇太后几筵前行殷奠禮。○諭內閣。和春。福濟。奏連日擊

賊獲勝一摺。廬州逆匪。曼經官軍痛勦。仍敢負隅抗拒。六月二十六等日。和春督兵進攻。南路賊匪分股來撲。城內之賊亦由得勝水西等門。出城接應。兵勇分路截擊。共斃賊七八百名。初七日。官軍於大堂店築壘。城內逆賊由得勝門南門出撲。旋被擊退。斃賊多名。南路之賊復於初九日。被官軍分途攻勦。屍骸枕藉。約斃八九百名。砍獲首級二十七顆。奪獲槍礮等械二百餘件。該逆等經此。疊加懲創。自己膽落。和春福濟。務應督率將弁。乘勝攻勦。亟圖克復廬城。毋得再涉延緩。○又諭。賂秉章奏。南北兩路。勦賊獲勝情形一摺。湖北通山等處逆匪。被湖南兵勇擊退後。仍踞通城。意圖南竄。經魁

聯。江忠濟。分遣楚勇。出境迎勦。自三月二十二日。至二十七日。連獲勝仗。先後斃賊二百餘名。及六七百名不等。賊已敗竄。復有崇陽逆黨。及江西義甯賊匪。分股再踞通城。並由臨湘小路竄及新牆。經江忠濟派出之守備徐志近。郭漢雲等。迎擊斃賊無數。湘陰長樂園勇。復會合四萬餘人。分途進攻。毀賊營棚八十餘架。連日乘勝追殺。沿途斃賊。每仗不下數百人。該匪全數遁歸老巢。湖南北境。邊防尚能堵禦。著賂秉章。即飭江忠濟等。激勵團勇。分投堵勦。將通城交界各處聚匪。併力殲滅。以固藩籬。至廣東竄匪。占踞郴州宜章後。復有另股圍撲臨武縣城。及桂陽縣之文明司地方。六月初七。至

十五等日。臨武縣官紳各督團勇攻守兼施。斃賊五六百名。賊眾敗潰。遂乘勝追至宜章縣界。斃賊數百。臨武城圍頓解。桂陽逆匪亦於六月十三日至二十三日。經該署縣吳清鵬等調集團勇練勇。合營圍攻。每日斃賊數百。生擒賊目譚昌幅等十六名。賊仍敗竄廣東仁化縣境。桂陽賊匪亦退。其宜章縣城據奏業已收復。郴州踞城之賊據奏連日分路進攻。殺賊甚多。該逆未敢分竄。著駱秉章督飭參將李輔朝等迅速進攻。力圖克復。俾得次第掃除。廓清南路。其東安獲勝情形仍著查明具奏。○諭軍機大臣等。前因東河下北廳屬銅瓦廂黃水漫溢。諭令楊以增將豐北口門乘機堵築。茲據該

河督奏稱興築經費勸捐難以濟事。惟有督率疏防之道將府廳等將應行補還正隄工程設法籌款。趕緊賠堵等語。此項工程趁此機會。自可節省經費。著楊以增詳細履勘。即在該道將等應行補還項下設法籌辦。其餘應辦堵工應估挑工。所需用項尚多。能否勸捐接濟。該河督務當實力辦理。一俟捐項賠項集有成數。即行據實奏聞。將此諭令知之。○以託病擅離岳州防所。降湖南按察使魁聯為知府。以浙江杭嘉湖道周起濱為湖南按察使。○予安徽陣亡驍騎校德慶把總蔣萬福外委蘇興瓏。湖南陣亡縣丞姚榮卿。把總林志祺等祭葬世職。附生李文淳等賞卹如例。○辛巳辰刻。

上詣

慈宣宮

大行皇太后几筵前行啟奠禮。申刻。復詣
几筵前行辭奠禮。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百七十二

